

四庫全書

經部

欽定四庫全書

經部

讀禮通考卷九十一

詳校官監察御史臣劉湄

給事中臣溫常綬覆勘

總校官編修_臣王燕緒

校對官典簿_臣郭祚熾

謄錄監生_臣鄧友懷

欽定四庫全書

讀禮通考卷九十一

刑部尚書徐乾學撰

葬考十

山陵四

宋僖祖欽陵

東都事畧建隆元年三月壬戌有司上皇高祖文安
府君謚曰文獻皇帝廟號僖祖皇高祖妣崔氏謚曰
文懿皇后陵曰欽陵

順祖康陵

東都事畧建隆元年三月有司上皇曾祖中丞府君
謚曰惠元皇帝廟號順祖皇曾祖妣桑氏謚曰惠明
皇后陵曰康陵

翼祖定陵

東都事畧建隆元年三月有司上皇祖驍衛府君謚
曰簡恭皇帝廟號翼祖皇祖妣京兆郡夫人劉氏謚
曰簡穆皇后陵曰定陵

宋史禮志順祖翼祖皆葬幽州至真宗始命營奉三陵遂以一品禮葬河南縣制度比安陵減五分之一石作減三分之一尋改定陵曰靖陵

宣祖安陵

東都事畧建隆元年三月有司上皇考武清府君謚曰昭武皇帝廟號宣祖陵曰安陵

宋史禮志安陵在京城東南隅乾德初改卜河南府鞏縣西南四十里訾鄉鄧封村以司徒范質為改卜

安陵使學士竇儼禮儀使中丞劉溫叟儀仗使樞密
直學士薛居正鹵簿使太宗時尹開封為橋道頓遞
使質尋免相以太宗兼轄五使事修奉新陵皇堂下
深五十七尺高三十九尺陵臺三層正方下層每面
長九十尺南神門至乳臺乳臺至鵲臺皆九十五步
乳臺高二十五尺鵲臺增四尺神牆高九尺五寸環
四百六十步各置神門角闕

東都事畧宣祖昭憲皇后杜氏建隆二年崩于滋德

殿謚曰明憲葬安陵乾德二年改卜安陵更謚曰昭
憲合祔安陵

文獻通考安陵陪葬子孫一百二十一墳

太祖永昌陵

東都事畧開寶九年冬十月癸丑帝崩于萬歲殿明
年四月乙卯葬永昌陵

宋史禮志陵在鞏縣祔宣祖

東都事畧太祖孝惠皇后賀氏周顯德五年崩葬安

陵之西北

孝明皇后王氏葬于安陵之北

宋史禮志孝明孝惠二后乾德元年十二月時議改
卜安陵于輦并以二后陪葬焉皇堂之制下深四十
五尺上高三十尺陵臺再成四面各長七十五尺神
牆高七尺五寸四面各長六十五步南神門至乳堂
四十五步高二丈三尺四月九日葬孝惠于安陵之
西北孝明于安陵之北

乾學案宋時皇后如宣祖昭憲杜后合祔安陵為行前代之禮而太祖之孝明孝惠二后一葬宣祖安陵西北一葬安陵之北孝章宋后亦不同兆域太宗皇后尚有葬安陵西北者章獻明肅劉后亦葬真宗永定陵西北隅當時禮官不主祔葬今采錄宋時皇后葬地並附著於帝後以便考覽也

宋史禮志孝章皇后宋氏至道元年四月崩六月上

謚曰孝章皇后以歲忌權輦于趙村沙臺三年正月
祔葬永昌陵之北皇堂陵臺神牆乳臺鵲臺並如孝
明園陵制度

文獻通考永昌陵陪葬子孫一十五墳

太宗永熙陵

東都事畧至道三年三月癸巳帝崩于萬歲殿十月
己酉葬永熙陵

宋史禮志永熙陵皇堂深百尺方廣八十尺陵臺方

二百五十尺置衛士五百人于陵

東都事畧太宗淑德皇后尹氏早崩葬于孝明陵之西北
懿德皇后符氏葬于安陵之西北 明德皇后李氏祔葬永熙陵
元德皇后李氏以真宗生母祔葬永熙陵

文獻通考元德皇后李氏以至道三年十月追尊先
殯于普安禪院咸平元年議改卜園陵二年命使按
行園陵地議立陵名禮官言周顯德末都省集議故

事帝后同陵謂之合葬同塋謂之附葬漢呂氏陵在長陵西百餘步以同塋兆而無名號又唐穆宗二后王氏生敬宗蕭氏生文宗並附葬光陵之側今園陵鵲臺在永熙陵封地之內恐不須別建陵號從之

永熙陵陪葬子孫八墳

真宗永定陵

東都事畧乾興元年二月戊午帝崩于延慶殿冬十月己酉葬永定陵

宋史禮志山陵按行使監繼宗言據司天監定永安縣東北六里曰卧龍岡堪庀山陵詔雷允恭覆按以聞皇堂之制深八十一尺方百四十尺制陵名曰永定

文獻通考始丁謂請名陵曰鎮陵及謂貶馮拯謂三陵皆有永字故易曰永定陵然永安乃縣名也宣祖陵止名安陵又翼祖已名定陵于是復改翼祖陵為靖陵議者譏拯不學當時無正之者

宋史后妃傳真宗章懷潘皇后端拱二年五月薨葬永昌陵之側陵名保泰章穆郭皇后景德四年崩葬永熙陵之西北

宋史禮志章獻明肅皇后劉氏明道二年三月崩于寶慈殿司天監詳定山陵制度皇堂深五十七尺神牆高七尺五寸四面各長六十五步乳臺高一丈九尺至南神門四十五步鵲臺高二丈三尺至乳臺四十五步十月五日葬永定陵之西北隅

宋后妃傳李宸妃生仁宗章獻以為己子仁宗不自知為妃所出也明道元年薨章獻太后欲以宮人禮治喪丞相呂夷簡奏禮宜從厚太后獨坐簾下召呂夷簡問曰一宮人死相公云何夷簡曰臣待罪宰相事無內外無不當預太后怒曰相公欲離間吾母子耶夷簡從容對曰陛下不以劉氏為念臣不敢言儻念劉氏則喪禮宜從厚太后悟遽曰宮人李宸妃也夷簡請治喪用一品禮殯洪福院夷簡又謂入內都

知羅崇勲曰宸妃當以后服殮用水銀實棺異時勿謂夷簡未嘗道及崇勲如其言後章獻太后崩燕王為仁宗言陛下乃李宸妃所生死以非命仁宗號慟尊妃為皇太后謚曰莊懿幸洪福寺祭告易梓宮親往視之妃玉色如生冠服如皇太后以水銀養之故不壞仁宗歎曰人言其可信哉遇劉氏加厚陪葬永定陵慶厯中改謚章懿

禮志章惠皇后楊氏明道三年十二月崩四年二月

葬永定陵之西北隅

仁宗永昭陵

東都事畧嘉祐八年三月辛未帝崩于福寧殿冬十月甲午葬永昭陵

傳家集殿中侍御史司馬光言山陵擇地劄子曰臣竊聞大行皇帝欲以十二月二十七日大葬而朝廷遣使按行山陵至今未知定處或云欲於永安縣界之外廣求吉地臣愚以為過矣夫陰陽之書使人拘

而多畏至於喪葬為害尤甚是以士庶之家或求葬地擇歲月至有累世不葬者臣常深疾此風欲乞國家禁絕其書而未暇也今山陵大事當守先王之典禮至於葬書出於世俗委巷之言司天陰陽官皆市井愚夫何足問也古者天子七月諸侯五月大夫三月士踰月葬於北方北首未嘗問歲月相山岡然考其子孫之吉凶豈有異於今哉春秋書己丑葬戊午日下是乃克葬然則雖云卜日亦臨事制宜也周禮

冢人掌公墓之地先王之葬居中以昭穆為左右明
不擇地形也然而周有天下三十六王八百六十七
歲蓋王者受命於天期運有常國之興衰在德之美
惡固不繫葬地時日之吉凶也且葬者藏也本以祖
宗之形體得土厚水深高敞堅實之地則可矣子孫
豈可因以求福哉又向者國家以拘於時日之故堅
用八日大斂自爾以來聖躬有疾至今尚未平復陰
陽無驗亦已明矣況國家自宣祖以來葬于永安百

有餘年官司儲峙素皆有備今改卜他所不惟縣邑
官司更須創制亦恐大行皇帝神靈眷戀祖宗未肯
即安於新陵也凡科率之物期日遠則民力寬而事
易辦期日近則費愈多而事不集磚石之類體重難
移若山陵之處不使預先知之則有司何以供辦百
姓何以輸納至時暴加迫趣則一錢之物必直十錢
疲羸之民將不勝其弊伏望朝廷特賜指揮按行山
林使等只於永安界舊陵側近選擇善地旬日之內

早定奪聞奏仍令有司預先計度山陵的實合用之物降下本處寬設期限使之備辦不得太約虛數及妄定近限必使號令明信則事無不濟而民力不困矣

名臣琬琰之集鄭獬上疏曰仁宗大行皇帝永昭陵依乾興制度雖未為過侈以今較昔蓋有不同乾興帑庫充積財力有餘故可以溢祖宗之舊制今國用空闕財賦不支將累歲邊備一日費之不知何年復

能充補萬一歲凶民饑少有風塵之警則將何策以
禦豈可以乾興為法也夫儉葬之制周公非不忠曾
子非不孝以為褒君愛父不在於聚財此前世之極
論竊惟大行皇帝節儉愛民出於天性無珠玉奇異
之好無犬馬游觀之樂服御至於澣濯器玩極於樸
陋此天下之所共知也今山陵制度乃取乾興最盛
之時為準獨不傷先帝平日積儉之德乎臣以為宜
飭有司條其名數再議減節

范鎮奏曰竊聞大行皇帝受命寶及沿寶法物與平生衣冠器用皆欲舉而葬之恐非所以稱大行皇帝恭儉之意其受命寶伏乞陛下自寶用之且示有司傳付若衣冠器玩則請陳於陵寢及神御殿歲時展視以慰思慕詔檢討官討尋典故及命兩制官禮官詳議翰林學士王珪等奏議曰受命寶者猶昔傳國璽也宜為天子傳器不當改作古者藏先王衣服於廟寢至於平生器玩則前世既不皆納於方中亦不

盡陳於陵寢謂今宜從省約以稱先帝恭儉之實臣等謹議殿中侍御史傅堯俞乞減昭陵用度疏曰伏聞大行皇帝山陵一準真宗山陵故事臣竊以定陵比永昌永熙事事益增陛下孝思無窮故取禮物極盛者為比臣徘徊顧思感傷陛下哀念先帝之意而竊未敢以為得也伏惟陛下周覽博識貫通古今至於孝不繫於厚葬奢無益於逝者固不待臣言而後曉所以不復遠引旁摭為蔓辭以重煩聖聽獨有一

事慮陛下悲慕之切未遑及之故臣昧死以陳夫以陛下之孝天下之廣俾先帝陵寢更加於真廟亦不為難也然古先哲王多以儉薄為美者豈歎於力而嗇於財耶蓋人情不以禮節之則將無有限斷臣竊謂送終之具得如太祖太宗先帝可以無憾奉先之志得如太宗真宗陛下可以無愧況乾興事體與今不同而大行皇帝享國四十二年慈愛惻惻惟恐一物失其所今之興役正當盛夏工限過急不能免傷

人之生物雖官給不能免勞民之力若緣定陵制度
禮物稍加裁損則傷生者坐減而勞力者易供先帝
在天之靈必將大以為慰也敢乞陛下詳思遠慮以
禮斷情俾大行山陵取永昌永熙為例既足以終先
帝恭儉之德而奉承遺詔又足以發陛下仁孝之道
而光昭初政一舉而衆善皆得

元豐三年程頤代富弼上神宗皇帝論永昭陵疏臣
弼伏觀太皇太后山陵有期老臣之心有所甚切不

忍不言昧死以聞惟陛下深思而力行之不勝大願
往者營奉昭陵時英宗皇帝方不豫未能聽事朝廷
罔然不知其制失於迫卒不復深慮博訪凡百規畫
一出匠者之拙謀中人之私意以巨木架石為之屋
計不百年必當損墜壙中又為鐵罩重且萬斤以木
為骨大止數寸不過二三十年決須摧毀梓宮之厚
度不盈尺異日以萬鈞之石自高而墜其將奈何思
之及此骨寒膽喪臣始則不知其詳後則無以為計

士民之間有知之者無不痛心飲恨況老臣之心乎
況陛下之心乎其後厚陵始為石藏議者竊意主事
大臣已悟昭陵之事獨陛下未知之爾今也不幸太
皇太后奄棄天下之養因此事會當為之謀竊以周
公制合葬之禮仲尼善魯人之祔歷代諸陵雖不盡用
亦多行之太祖皇帝神謀聖慮超越萬古昭憲太后
亦合安陵夫以周公之制仲尼之訓歷代之舊藝祖
之法循而行之可無疑也老臣願陛下思安親之道

為後日之慮決於聖心勿循浮議奉太皇太后合祔
昭陵因得徹去鐵罩用厚陵石藏之制仍更別加裁
處使異日雖木壞石墜不能為害救仁皇必至之禍
成陛下莫大之孝復何難哉在陛下斷之而已既合
禮典又順人情雖無知之人必不敢以為非是但恐
有以陰陽拘忌之說上惑聰明者在陛下睿斷不難
辨也不遵聖訓不度時宜而規規於拘忌者為賢乎
為愚乎且陰陽之說設為可信吉凶之應貴賤當同

今天下臣庶之家夫婦莫不同穴未聞以為忌也獨
國家忌之有何義理唐中宗庸昏之主尚能守禮法
盡孝心責嚴善思愚惑之論卒祔乾陵其為高宗子
孫歷世延永是合葬非不利也老臣位至三公年將
八十復何求哉所保者名節而已肯不以是事勸陛
下取譏於後世乎復恐陛下謂臣心雖忠切而識慮
愚暗不能曉達事理臣誠至愚然臣所言者欲陛下
守經典之訓遵藝祖之軌使仁宗皇帝得安全之道

於太皇太后極崇奉之意豈獨老臣之心哉天下之心莫不然也陛下不信試以臣之所陳訪於羣臣必無以為非者若以臣言為非則是使仁宗遺骨聖體碎於巨石之下而不恤乃為是也凡有血氣之類孰肯為此意乎臣事仁宗皇帝三十餘年位至宰相聾瞽之蔽不能早知而救之於始已為大罪今遇有為之時若更惜情顧已不能極言天地神靈必加誅殛死何面目見神宗於地下且陛下不知則已今既聞

之在常人之情無可忍而不為之理況陛下至仁大孝乎唯陛下深思而力行之則天下不勝大願

程頤上富鄭公書頤頃歲見治昭陵制度規畫一出匠者之拙謀中人之私意宰執受命而已莫敢置思以巨木架石為之屋計不百年必當損墜既又觀陵中之物見所謂鐵罩者幾萬斤以木為骨大不及三寸其相穿叩之處厚纔寸餘遠不過二三十年決須摧朽壓於梓宮於時私心皇駭不能自已使人間於

魏公魏公不以為意以魏公之忠孝於仁皇非不盡心唯以蔽於衆論昧於遠慮以天下之力葬一人於至危之地可不痛哉陵土既復固知無可奈何然每一念之心悸魄喪或終夕不寐今鄉鄰之間有如是事可為謀而不以告人必謂之不信況仁皇天下父母乎今也不幸太皇太后奄棄宮闈因此事會可為之謀夫合葬之禮周公以來未之有改近取諸唐帝后亦或同穴至於乾陵乃是再啓太祖皇帝神謀遠

慮超越萬古昭憲太后亦合安陵稽典禮則得尊親之道徇俗法則皆享福之永此為可行無足疑者伏願公忠誠奮發為朝廷極論其事請奉太皇太后合祔昭陵因得徹去鐵罩用厚陵石槨之制仍更別加裁處使異日雖木壞石墜不能為害救仁皇必至之禍成主上莫大之孝任此事者非公孰能誠能為之天祐忠孝必俾公熾昌壽臧子孫保無疆之休竊惟公事仁宗皇帝三十餘年位極人臣恩遇無比料公

之心苟能使仁皇聖體保其安全雖陷禍患所不避也況一言之易肯顧慮而不發乎事理至明顧主上素未知爾以公言之重竭誠致懇再三陳之不憂朝廷之不悟獨繫公為不為爾哀哉憤激語辭鄙直內省狂易戰慄無地不宣

蘇洵上韓昭文論山陵書竊見先帝以儉德臨天下在位四十餘年宮室遊觀無所增加帷簿器血敝陋而不易天下稱頌以為文景之所不若今一旦奄棄

臣下有司乃欲以末世葬送無益之費侵削先帝休息長養之民掇取厚葬之名而遺之以累其盛明故洵以為當今之議莫若薄葬竊聞頃者癸酉赦書既出郡縣無以賞兵例皆貸錢於民民之有錢者皆莫肯自輸於是有威之以刀劍驅之以笞箠為國結怨僅而得之者小民無知不知與國同憂方且狼顧而不寧而山陵一切配率之科又以復下計今不過秋冬之間海內必將騷然有不自聊賴之人竊惟先帝

之所以愛惜百姓者如此其深其所以檢身節儉者如此其至也推其平生之心而計其既沒之意則其不欲以山陵重困天下亦已明矣而臣下乃獨為逾禮之費以拂其平生之意竊所不取也且使今府庫之中財用有餘一物不取於民盡公力而為之以稱遂臣子不忍之心猶且獲譏於聖人況乎空虛無有一金以上非取於民則不獲而冒行不顧以徇近世失中之禮亦已惑矣然議者必將以為君子不以天

下儉其親以天下之大而不足於先帝之葬於人情有所不順洵亦以為不然使今儉葬而用墨子之說則是過也不廢先王之禮而去近世無益之費是不過矣子思曰三日而殯凡附於身者必誠必信勿之有悔焉耳矣三月而葬凡附於棺者必誠必信勿之有悔焉耳矣古之人所由以盡其誠信者不敢有畧也而外是者則畧之昔華元厚葬其君君子以為不臣漢文葬於霸陵木不改列藏無金玉天下以為聖

明而後世安於太山故曰莫如建薄葬之議上以遂
先帝恭儉之誠下以紓百姓目前之患內以解華元
不臣之譏而萬世之後以固山陵不拔之安如曰詔
勅已行制度已定雖知不便而不可復改則此又過
矣蓋唐太宗之葬高祖也欲為九丈之墳用漢氏長
陵之制百事務從豐厚及羣臣建議以為不可於是
改從光武之陵高不過六丈而每事儉約夫君子之
為政與其坐視百姓之艱難而重改令之非孰若改

令以救百姓之急不勝區區之心敢輒以告惟恕其
狂易之誅幸甚幸甚

韓忠獻遺事仁宗永昭陵葬且有日忽傳皇堂棟損
時諸使皆欲不問而掩之韓公琦正色曰不可果損
當易之若違葬期侈所費此責猶可當若苟且掩之
後有壞而致人主疑心臣下何以當責

宋史禮志慈聖光獻皇后曹氏元豐二年十月崩于
慶壽宮命韓縝為山陵案行使縝言永昭陵北稍西

地二百六十步內取方六十五步可為山陵上以迫
臨詔增十步三月十日葬永昭陵

英宗永厚陵

東都事畧治平四年春正月帝崩于福寧殿秋八月
癸酉葬永厚陵

文獻通考英宗崩遺詔山陵務從省約所歷郡縣無
科率煩民八月葬永厚陵禮如舊制

名臣琬琰之集神宗時程頤代父上書曰臣聞孝莫

大於安親忠莫先於愛主人倫之本無越於斯人無
知愚靡不知忠孝之為美也然而不以其道則反害
之故自古為君者莫不欲孝其親而多獲不孝之譏
為臣者莫不欲忠其君而常負不忠之罪何則有其
心行之不得其道也伏惟陛下以至德承洪業以大
孝奉先帝聖心切至天下共知然臣以疎賤復敢區
區冒萬死以進其說者願陛下以至孝之心盡至孝
之道監歷古之失臣觀秦漢而下為帝王者居天下

之尊有四海之富其生也奉養之如之何其亡也安
厝之如之何然而鮮克保完其陵墓者其故何哉獨
魏文帝唐太宗所傳嗣君能盡孝道為之永慮至今
安全事迹昭然存諸簡策嗚呼二嗣君不苟為崇侈
以徇己意乃以安親為心可謂至孝矣漢武之葬霍
光秉政暗於大體奢侈過度至使陵中不復容物赤
眉之亂遂見發掘識者謂赤眉之暴無異光自為之
謂其不能深慮以致後害也二君從儉後世不謂其

不孝霍光厚葬千古不免為罪人自古以來觀此明鑑而不能行之者無他衆議難違人情所迫爾苟若務合常情遂忘遠慮是乃厚於人情而薄於先君也不亦惑乎魏文帝所作終制及唐虞世南所上封事皆足取法其指陳深切非所忍言願陛下取而觀之可以見明君賢臣所慮深遠古人有言曰死者無終極國家有廢興自昔人情當大事之際乃以興廢之言為忌諱莫敢議及於此苟循人情辜負往者不忠

之大者也臣竊慮陛下追念先帝聖情罔極必欲崇厚陵寢以盡孝心臣愚以為違先帝之儉德損陛下之孝道無益於實有累於後非所宜也伏願陛下損抑至情深為永慮承奉遺詔嚴飭有司凡百規模盡依魏文之制明器所需皆以瓦木為之金銀銅鐵珍寶竒異之物無得入壙然後昭示遐邇刊之金石如是則陛下之孝顯於無窮陛下之明高於曠古至於紉帛易朽之物亦能為惠於數百年之後漢薄后是

也或曰山陵崇大雖使無藏安能信於後世臣以為不然天下既知之後世必知之臣常遊秦中歷觀漢唐諸陵無有完者惟昭陵不犯陵旁居人尚能道當日儉素之事此所以歷數百年屢經寇亂而獨全也夫臣之於君猶子之於父豈有陛下欲厚其親而臣反欲薄於其君乎誠以厚於先帝無厚於此者也遺簪墜履尚當保而藏之不敢不恭況於園陵得不窮深極遠以慮之乎陛下嗣位方初羣臣畏威臣苟不

言必慮無敢言者陛下以臣言為妄而罪之則臣死
且不朽以臣言為是而從之則可以為先帝之福大
陛下之孝安天下之心垂萬世之法所補豈不厚哉
臣哀誠內激言意狂率願陛下詳覽而深察之天下
不勝大願

翰林學士范鎮上奏曰乾德初改葬宣祖安陵之制
其深五十七尺高三十九尺其下宮及兆域遠近之
數皆稱於是是時天下既定財用滋豐非不能崇高

侈大以示意而榮親也蓋太祖皇帝方無事時念深思遠以為厚葬非禮無益於孝作為終制以示後世法也昌陵熙陵定陵昭陵雖增損不一然皆非太宗真宗仁宗大行皇帝之意實哀毀號慕之際有司而為是也昭陵之役距今四年中間仍以水災則公私事力為可知也伏惟陛下抑哀毀號慕之情奉太祖之中制其今來上宮下宮及兆域之數願一以安陵為祖使國用民力得少寬裕則四方觀聽知陛下愛

民念祖之心以為初政之美臣不勝區區之意

演繁露溫公日記記英廟山陵舊制曰山陵皇堂壘石為四壁積材木於上以卷石覆之神宗以材木有時而朽則卷石必墜於梓宮不便更令就地為石樽以藏梓宮總管張若水恐穿地或墮陷四壁乃請於平地壘石為樽及後山陵復土梓宮入降隧道升石樽西首御夷牀不及地一尺而止俟已時一刻乃下仍於其上布方木及蓋條石乃設御座於蓋下闔石

門出築合隧道案此則是神宗慮木久遠必朽朽必
壓故專令卷石為榑起自地上石既四周捲起交相
鈎鬪永不壓壞最為堅耐趙州石橋正用捲石法故
大水不能齧重車不墊也神宗雖有此旨若水董役
不敢廢去舊制故捲石之上仍鋪蓋木設使蓋木朽
壞而其下自有捲石承之殆無害也

宋史禮志英宗宣仁聖烈皇后高氏哲宗元祐八年
九月三日崩于崇慶宮詔園陵依慈聖光獻太皇太

后之制紹聖元年四月一日葬永厚陵

神宗永裕陵

東都事畧元豐八年三月戊戌帝崩于福寧殿冬十月乙酉葬永裕陵

宋史禮志紹聖四年太史請遷去永裕陵禁山民冢一千三百餘以便國音帝曰遷墓得無擾乎若無所害則令勿遷果不便國音當給官錢以資葬費

名臣琬琰之集哲宗初秘書省正字范祖禹上言臣

聞儉葬者聖哲之訓也奢葬者世俗之失也宋華元厚葬其君君子以為不臣漢世山陵多藏金玉故有張釋之之言劉向之論世所明知也武帝在位歲久茂陵中物無所容霍光不達大體以厚葬為愛君無所減損從而益之故西漢之末唯霸陵獨完葬之厚薄禍福可覩矣臣誠知國家山陵迭往儉於前代然猶以為言者欲於儉省之制損之又損使天下知其中無所有見其中無可欲則萬世之利也臣昔者伏

見仁宗皇帝葬于昭陵有緘封皮匣納之方中者甚多皆出於禁中人莫得而知也臣愚以為如此之類無益於先帝竊恐沿襲故事猶或藏之推此類以損之必猶有可損者也昔周太祖將終戒世宗曰昔我西征見唐十八陵無不發掘者此無他惟多藏金玉故也我死當衣以紙衣斂以瓦棺勿作石羊虎人馬唯刻石置陵前云周天子平生好儉約遺令用紙衣瓦棺嗣天子不敢違也如或吾違吾不福汝周祖生

於五季之末非有前聖之識而其葬乃如太古此其志賢於秦始皇遠矣近事不遠即本朝所代也臣以為周祖懲唐奢葬故以儉薄矯之然以天子之喪而幾於羸葬則太偏而不可為繼今惟於儉制之中加省約焉可也臣頃在書局未嘗敢越職言朝廷得失今非職而言者竊以先帝之服臣子所同也先帝之葬四海所共也臣身服先帝之服預先帝之葬知其不合於禮而不言憂其或過於厚而不以告臣所不

能已也臣嘗采唐事為唐鑑數百篇欲獻之先帝屬
先帝不豫未及上其中一篇論厚葬一篇論喪服輒
不自揆謹錄上進庶幾觀古以知今少裨萬一焉干
冒旒宸臣無任惶懼俟罪之至

元符初著作郎周常上疏言祖宗諸陵器物止用塗
金服飾又無珠玉蓋務質素昭示訓戒自裕陵至宣
仁后寢宮乃施金珠願收貯景靈殿以遵遺訓詔置
之奉宸庫

宋史禮志神宗欽聖憲肅皇后向氏建中靖國元年正月十三日崩太常寺言大行皇太后山陵一行法物宜依元豐二年慈聖光獻皇后故事皇堂之制下深六十九尺面方二丈五尺石地穴深一丈明高二丈一尺鵲臺二各高四十一尺乳臺二各高二丈七尺神牆高一丈三尺五月六日葬永裕陵

宋史后妃傳欽成朱皇后生哲宗崇寧元年二月薨追冊為皇后陪葬永裕陵 欽慈陳皇后生徽宗帝

崩守陵殿未幾薨建中靖國元年追冊為皇太后陪
葬永裕陵

哲宗永泰陵

東都事畧元符三年春正月己卯帝崩于福寧殿七
月壬寅葬永泰陵

禮志哲宗崩徽宗即位詔山陵制度並如元豐

名臣琬琰之集陳瓘乞憫恤山陵人夫疏曰臣聞唐
穆宗山陵久雨時寒役人饑凍頗甚至有持鍤抱簞

而死者敬宗憫之於是治路人夫各賜之絹臣謂絹者有限之物豈得人人而與之兼諸色應奉之人例皆勞苦所可矜者非特治路人夫而已也國家自裕陵以前大事既畢之後即降德音下兩京等處凡干應奉之人悉蒙恩恤惠而不費非賜絹之比也迺者泰陵應奉之人緣雨水異常州縣督責甚於他時所以叙其情而憫其勞者亦宜加厚惟陛下留意

東都事畧昭懷皇后劉氏政和元年崩陪葬永泰陵

禮志昭慈聖獻皇后孟氏紹興元年四月崩以遺詔
擇近地權殯俟息兵歸葬園陵梓宮周身勿拘舊例
以為他日遷祔之便六月殯于會稽上亭鄉欒宮方
百步下宮深一丈五尺明器止用鉛錫置都監巡檢
一員衛卒百人

朝野雜記國朝自宣祖葬河南之永安其後六聖皆
祔紹興元年昭慈聖獻皇后崩于越州遣告權宜擇
地欒殯候軍事寧息歸葬園陵梓宮所周於身以為

他日遷奉之便於是權殯於會稽縣之上皇村以香
火院為恭寧寺 昭慈之喪以同知樞密院事李回
為總護使刑部尚書胡直孺為橋道頓遞使神武左
軍都統韓世忠為總管內侍楊公弼為都監調三衛
神武輜重越州卒千三百人穿復土不置五使永裕
顯仁亦如之至高宗山陵始備五使如典禮

揮麈錄昭慈聖獻皇后升遐欲建山陵外祖曾公行
議以為帝后陵寢今存伊洛不日復中原即歸祔矣

宜以攢宮為名僉以為當用之

徽宗永祐陵

東都事畧靖康二年三月丁巳道君皇帝北狩紹興
五年四月乙未帝崩十二年八月乙丑歸殯于龍德
宮十月丙寅葬永祐陵

聞見錄紹興己未春徽宗梓宮歸宰臣上陵名永固
有王銍者言犯後魏明帝後周文宣二后陵名下祕
書省參考如銍言遂改名永祐然漢平帝後漢殤帝

十國劉龔同曰康陵本朝順祖亦曰康陵後魏明帝
後周宣帝唐中宗同曰定陵本朝翼祖亦曰定陵前
漢惠帝唐懿宗皇后同曰安陵本朝宣祖亦曰安陵
唐太宗曰昭陵本朝仁宗曰永昭陵後魏宣武后曰
永泰陵唐元宗曰泰陵本朝哲宗亦曰永泰陵蓋本
朝陵名犯前代陵名者不一祖宗以來不避也

揮麈錄紹興戊午徽宗梓宮南歸有日秦丞相當國
請以永固名陵先人建言北齊叱奴皇后實名之不

可犯秦大怒幾蹈不測後數年易曰永祐

朝野雜紀徽宗梓宮將還宰相秦檜白令侍從臺諫
禮官尚書省集議靈駕既還當崇奉陵寢或稱攢宮
禮部員外郎眉山程敦厚希檜意獨上奏言仍攢宮
之舊稱則莫能示通和之大信用因山之正典則若
忘存本之後圖臣以為宜勿徇虛名而當示大信於
是議者工部尚書莫將等乃言太史稱歲中不利大
葬請用明德皇后故事權攢許之議狀遠引明德而

近舍昭慈似有所避也其後高宗遣告亦稱櫓宮迄
今循為故事 徽宗初葬五國城後七年金人乃以

梓宮還行在梓宮至寓于龍德別宮以故待漏院為
之在行宮南門外之東帝后異殿先是選人楊緯獻
書于執政李光以梓宮可還真偽未辨左宣義郎王
之道亦遺書諫官曾統奏乞命大臣取神櫬之最下
者斲而視之然後奉安既而禮官請用安陵故事梓
宮入境即承之以樽有司預製袞冕翬衣以往至則

納攢中不改斂 永祐陵在昭慈攢宮西北五十步
用地二百二十畝攢宮歲用祠祭錢八千四百餘緡
修繕錢五千緡

東都事畧顯恭皇后王氏徽宗即位冊為皇后生欽
宗崩葬永裕陵之次 明達皇后劉氏冊拜貴妃政
和三年薨徽宗追冊為皇后陪葬惠恭皇后園 明
節皇后劉氏由才人進位貴妃宣和三年薨追冊為
皇后與明達並園

宋史后妃傳鄭皇后從上皇幸青城北遷留五年崩于五國城謚顯肅梓宮歸入境承之以樽納輦衣其中與徽宗合攢于會稽永祐陵 韋賢妃高宗母從上皇北遷紹興七年遙尊為皇太后十二年歸臨安居慈寧宮崩謚曰顯仁攢于永祐陵之西

朝野雜紀顯仁皇后攢宮在顯肅宮之西十九步二攢宮舊未有禁地顯仁既葬始立四隅以二十里為禁城凡民居丘墓皆遷之

文獻通考顯仁皇太后韋氏崩祔于永祐陵攢宮詔
兩攢宮禁地內有遷士庶墳冢屋宇及收買士庶田
產山林地段專委守臣同檢察官陵所攢置告諭先
估定實直倍數支還取人戶領毋令人吏乞覓騷擾
殿中侍御史汪徹言竊惟攢宮之地舊占百步去冬
新立四隅回環不啻二十里居民悉已遷徙屋廬悉
已毀撤寸土尺木率居於官今皆為禁地而士庶丘
隴錯雜其中陰陽家流或謂盡宜挑去以肅靜陵域

且有內將外從天柱門三男之說或謂暫為攢宮不
必挑去是故上貽聖慮命臣躬親前去看定臣遵奉
審訓周視四隅見得士庶墳塚原計九百三十八穴
除近已挑去一百七十二穴外有七百六十六穴見
存竊以攢宮經今三十餘年無有議其非者今二十
里之內乃云盡令挑移始有紛紛之論太史局各守
其說皆虛誕浮誣不可取信臣請以史傳及祖宗故
事明之秦檮里子死葬于渭南章臺之東曰後百歲

是當有天子之宮夾我墓至漢興長樂宮在其東未央宮在其西武庫正直其墓且以天子之宮密近而當時不聞遷其墓也以今觀之一百二十七穴業已挑去而築實之無可奈何而見存七百六十六穴纍纍相望雖山林掩蔽皆在禁地若一旦悉令挑去恐頓泄地氣兼於人情有所未安欲下紹興府專委守臣出榜備坐宮陵制內所載曉諭民間如對界內舊墳有願遷出仰召保聞說經府自陳令巡尉監視聽

其遷出不願者仍舊從之

梅溪集王十朋代越帥王佐尚書上疏曰臣竊見攢
宮修造每年一小修三年一大修率以為常此固陛
下奉先極孝之心臣子所宜奉行而不懈也然臣竊
謂陵寢所在神靈是依神道貴幽理宜安靜若頻歲
修造不無震驚故古不修墓聖人非薄於其親意謂
寧親莫如寧神是乃孝之大者今攢宮棟宇已固器
用已備松柏已茂陛下崇奉之心亦可謂至矣臣欲

乞自今已後不必以三年大修每年小修為拘但令
本府常預備瓦石工匠之類以俟不時之須凡棟宇
或損則更之器用或舊則新之松柏或枯則補之如
是則工役不繁而丹雘常新歲月寢久而陵廟愈安
以昭先帝儉德之恭以稱陛下寧神之孝不勝幸甚
欽宗永獻陵

朝野雜紀欽宗之喪舉哀于天章閣南以學士院為
几筵殿遙上陵名曰永獻暨乾道中朝廷遣使求陵

寢地金人許以遷奉且併歸靖康梓宮朝廷難之金人乃以禮陪葬于鞏縣云

文獻通考孝宗乾道六年以起居郎范成大為祈請使之金請陵寢地先時上賜宰臣陳俊卿手札曰朕痛念祖宗陵寢淪於河洛四十餘年今欲特遣使就彼祈請卿以為如何可密奏來俊卿以為未可坐罷相知福州乃遣成大行令學士院草國書以陵寢所在欲求河南地為辭成大將行秘書少監李燾等

皆不以為然國子博士丘富輪對論其無益啓侮上
不樂曰卿家祖先墳墓為人占據莫亦須理會否荅
云臣但訴之不能告之上赫怒成大既出疆使還其
國書云和約再成界山河以如舊緘音遽至指輦浴
以為言援曩時無用之文續今日既盟之好既云廢
祀欲伸追遠之懷止可奉遷即俟刻期之報至若未
歸之旅柩亦當並發於行塗明年遣趙惟賀金主生
辰復附國書畧曰惟列聖久安之陵寢既難一旦而

驟遷則靖康未返之衣冠豈敢先期而獨請其後金
人從葬欽宗于鞏原而荆襄謀報乃謂金以十萬騎
奉還陵寢比來中外洶洶邊塞咸請增戍後卒無事
中興記建炎元年五月一日大赦天下詔永安軍祖
宗陵寢西京應天禪院會聖宮影殿西墳可差西京
留守及臺官一員日下前去躬親省視如合修奉去
處一面措置仍密具奏聞南墳委汝州守臣依此

演繁露宗子自祔葬山
陵之外又有南墳西墳

文獻通考建炎元年五月詔河南府鎮撫使翟興團
結本處義兵保護祖宗陵寢

北盟會編紹興九年二月以趙士儂為朝陵使兵部
侍郎張燾副之士儂燾往西京朝陵日延見父老宣
布天子德意迨至柏城披鉏荆棘隨宜葺治展敬成
禮而還五月回行在入對燾具劄子奏曰臣竊惟國
家遭百六之災禍流海宇上及山陵臣等恭謁柏城
至於慟哭祖宗在天之靈震怒已久躬行天討得無

望於陛下上問諸陵寢若何燾不對惟言萬世不可
忘此讐上為黯然

文獻通考時方庭實為三京淮北宣諭使至西京先
朝謁陵寢見永昌而下皆遇驚犯泰陵至暴露庭實
解衣覆之歸日痛哭流涕為上言之由是大忤秦檜

十月禮部言永安軍等處今已收復委知軍詣諸
陵逐位檢視除永定永昭永厚永裕永泰園陵內並
無損動內永安永昌永熙陵神臺塋列損枳橘栢株

木未敢一面擅行補飾合就差所委修飾官奏告行
禮詔令河南府委官如法補飾不得減裂

宋史理宗紀端平元年春正月史嵩之露布告金亡
遣郭春按循故壤請奉先縣汎埽祖宗陵寢三月詔
遣太常寺主簿朱揚祖閣門祗候林拓詣洛陽省謁
八陵四月詔遣朱復之詣八陵相度修奉八月朱揚
祖林拓朝謁八陵回以圖進上問諸陵相去幾何及
陵前澗水新復揚祖悉以對上忍涕歎息

讀禮通考卷九十一

欽定四庫全書

讀禮通考卷九十二

刑部尚書徐乾學撰

葬考十一

山陵五

高宗永思陵

文獻通考淳熙十四年高宗崩攢永思陵詔攢宮遵
遺詔務從儉約凡修營百費並從內庫及封樁錢物
毋侵有司經常之費諸路監司州軍府監止進慰表

其餘禮並免仍不得以進奉攢宮為名有所貢獻
趙忠定公奏議竊惟祖宗陵寢皆在洛陽累朝制度
具存典禮惟紹興中徽宗皇帝梓宮既還未能歸葬
故一時攢奉權在會稽雖寢衛之制已嚴而山陵之
土未復規制淺薄可為深憂竊聞當時議者之言欲
俟恢復疆土之後奉迎靈駕歸祔永昌迹其本謀初
若甚善然荏苒歲月易致因循正使克復西都豈宜
再議遷改今大行皇帝山陵命使遠日有期陛下篤

於送終動遵禮訓臣謂與其慕虛名而受實害孰若
及時深藏固護永為無窮之計也昔舜都蒲坂葬於
蒼梧禹都平陽葬於會稽皆因巡狩不反遂即其地
而葬帝王之事豈不可法伏願遠遵虞夏近法漢文
因山為陵務極深厚金銀之飾悉用迸除使千萬世
永絕後害則陛下之所以事其親者自始及終皆可
以無憾矣汝愚又論山陵乞遵用七月之制疏曰伏
聞有司循用近例不待七月已卜日奏攢臣仰惟陛

下大孝始終遠追三代方將以衰經行三年之喪思窮所以追慕之情而大葬之禮猶用權宜歲月推遷臣所甚懼臣聞之禮曰夫喪不可不深長思也又曰葬者藏也今太上皇帝梓宮雖已奉櫬要非久計況兩京在遠道路阻脩正使克復有期豈宜更議遷改孰若考據古誼及時而葬以圖萬世之安也又禮曰天子七日而殯七月而葬本朝故事亦皆用七月伏望檢照臣昨來所奏斷自聖意遵用累朝典禮議行

七月之制其山陵制度務存深厚不必過為開廣以藏無用之物此去三月間尚可營辦如此則太上皇帝在天之靈可以永安陛下事親送終之禮深長之思皆可以無憾矣臣遠守藩符山陵重事宜宜輕議而情切意迫不容但已謹昧死奏聞

思陵錄王相淮擬太上陵名凡五永紹永興永阜永壽永思上點用永思

文獻通考按行使蕭燧等言相視到大行太上皇帝

神穴地段係在徽宗皇帝欂櫨殿籬圍之外正西北顯
仁皇后欂櫨殿近上正西南乞差官覆按施行詔戶部
侍郎葉翥充覆按使

思陵錄思陵上官為獻殿三門六椽中間闊一丈六
尺兩間各一丈二尺其深三丈後為龜頭三間中間
濶一丈六尺兩間各五尺其深二丈四尺皇堂在焉
初開穴南北長三丈七尺六寸東西濶三丈二尺深
九尺四圍用白石膠土五層以石周砌為石藏長一

丈六尺二寸濶一丈六寸所用榑長一丈二尺三寸
高七尺一寸濶五尺五寸納梓宮於中覆以天盤裹
網乃用青石為壓欄次鋪承重柏木枋二十餘條次
鋪白氈二重次鋪竹篾然後用青石條掩攢訖上用
香土二寸容土六寸然後以方磚砌地其實土不及
尺耳下宮之制殿門三間四椽每間闊一丈四尺深
二丈前後殿各三間六椽其深三丈每間闊一丈四
尺東西兩廊一十八間四椽其深一丈六尺每間闊

一丈一尺殿門東西皆有挾屋一間六椽各闊一丈六尺其深三丈又有櫺星門神遊亭換衣廳

永思陵攢宮修奉使司據都壕寨官符思永申據修奉監修申契勘依奉聖旨指揮修奉永思陵攢宮今據諸作合千人都壕寨于慶等狀申開具造到上下宮殿宇門廊間架安卓等下項並於三月十二日一切畢工

一上宮 殿一座三門六椽入深三丈心間闊一丈

六尺兩次間各闊一丈二尺並龜頭一座三間入深
二丈四尺心間闊一丈六尺兩次間各闊五尺並四
下昂柱頭骨朶子月梁枋紋單拱幘風柱五寸二分
五釐材徹脊明圓椽順板內龜頭連檐四椽月梁枋
五寸二分五釐材圓椽厦板兩轉出角四入角扇子
白板下簷平柱高一丈二尺柱置在內頭頂並係丹
粉赤白裝造法紅油造柱木週迴櫺風簪共一百二
十扇并构欄子一十七間並係礬紅刷油造及腔內

出線小紋子共三十八扇係朱紅漆造黃紗糊飾安釘鑰石葉段事件頭頂鋪釘竹笆甌板瓦結甕行壠并安鴟鵂週迴山斜額道壁子並紅灰泥飾方磚鋪砌地面中城磚壘砌堦頭高三尺并週迴散水面南墁地白石壓欄石碇踏道角石角柱並引手杓欄子望柱覆蓮柱頭獅子龜頭皇堂石藏子一座裏明南北長一丈六尺二寸東西闊一丈六寸白石箱壁二重共厚四尺櫺土石一重厚一尺深九尺上用青石

壓欄一重厚八寸鋪承重柏木枋子二十二條上鋪
白檀二重安砌蓋條青石十條高一尺打築鋪砌磚
土共厚一尺通深一丈二尺箱壁石用鐵古字并鉛
澆灌 殿門一座三間四椽入深二丈心間闊一丈
六尺兩次間各闊一丈二尺四鋪下昂絞耍頭柱頭
骨朶子分心柱四寸五分材月梁枋徹脊明圓椽順
板扇子白板直廢造下簷平柱高一丈二尺柱置在
內頭頂丹粉赤白裝造礬紅油造柱木硬門三合額

頰地楸門開鐵鵝臺桶子墨油浮甌釘葉段門鉞頭
頂鋪釘竹笆甌板瓦結甕竹攏安鴟鵂週迴山斜額
道壁落紅灰泥飾土坯壘砌兩山牆紅灰泥飾中城
磚鋪砌地面壘砌堦頭高二尺五寸并砌散水白石
壓欄石碇并前後踏道及安砌面南白石墁地火
窰子一座作二三壘澀腰花坐頭頂頭柱頭斗口跳
骨朶子中城磚并除磚飛放簷槽小甌板瓦結甕行
壘并三壁捲葺門子磚窻裏用鐵索并丹粉赤白裝

造 殿門中城磚六辨壘砌水鋼四坐并設坐水大
桶二隻提水桶一十隻并灑子 櫺星門南北共二
坐柱頭上各安閥閱并各安門二扇肘葉門鉸桶子
全并石門砧及礮紅油造柱木門戶外離門一座安
卓門二扇並礮紅刷油造柱木并門及兩壁扎縛打
立實竹籬二十餘丈并立籬健石紅灰牆週迴長六
十三丈五尺上用杙笆椽鋪釘竹笆甌板瓦結甍行
壠礮紅刷造杙笆椽紅灰泥飾圍牆下脚用銀錠磚

壘砌隔減并中城磚壘砌鵲臺三堵裏籬磚牆係
中城磚繞簷壘砌週迴長八十七丈上用甌板瓦結
甕行隴東壁隔截磚牆係中城磚繞壘砌長四十
丈土地廟一座并龜頭一門頭頂並係丹粉赤白
裝造礬紅油造柱木等白灰泥飾壁落并仰望中城
磚砌地面并堦頭中板瓦結甕行隴并面南西壁壘
砌火窰子一座土地神衆共七尊黑漆供牀一張
巡鋪屋牆裏外共四間並白灰泥飾壁落中板瓦結

費地紅刷油造柱木立精地袱并週迴簷槽并磚砌
水缸四坐條磚砂堦東壁路道闊四丈長四十丈

一下宮 殿門一座三間四椽入深二丈各間闊一

丈四尺重斗口跳身內單拱方植枋徹脊明圓椽順
板扇子白板分心柱直廢造下簷平柱高一丈四寸
柱置在內頭頂丹粉赤白裝造法紅油造柱木并軟
硬門二合及頰額地袱門開等并黃油浮甌釘及門
鉸肘葉鵝臺桶子頭頂鋪釘竹笆甌板瓦結費行壠

并鷓鴣及週迴額道山斜壁子並紅灰造作并土坯
壘砌兩山牆紅灰泥飾中城磚鋪砌地面并塔頭高
二尺并砌散水及白石安砌壓欄石碇并前後踏道
火窯子一座下二三壘澀腰花坐頭頂顯柱頭斜口
跳骨朶子中城磚并條磚飛放簷槽小甌瓦結疊行
墉三壁捲輦門子磚窻裏用鐵索及用丹粉赤白裝
造前後殿二座各三間六椽入深三丈各闊一丈
四尺四鋪捲頭脰內絞單拱撐間心門前楸頂柱兩

山鞦韆柱徹脊明五寸二分五釐材圓椽順板扇子
白板柱頭骨朶子直廢造下簷平柱高一丈一尺柱
置在內頭頂並係丹粉赤白裝造法紅油造柱木並
板壁二十四扇朱紅漆造出線小絞梘子四十扇黃
紗糊飾安釘鑰石葉段事件并礬紅油造擗風簷八
十扇并构欄子八間頭頂鋪釘竹芭甌板瓦結甍行
龍并安鴟鵂方磚砌面中城磚壘砌堦頭高二尺五
寸并打花側砌天井子踴路并兩壁路道及包砌水

銅四坐白石壓欄石碇并踏道二坐引手构欄子望
柱覆蓮柱頭獅子 殿門東西兩挾各一間四椽入
深二丈間闊一丈六尺單斜直替方額混栱方椽硬
簷下簷柱高八尺五寸柱置在內頭頂丹粉赤白裝
造礬紅油造柱木黑油杈子二間頭頂鋪釘竹笆白
灰仰塗中板瓦結甍週迴壁落白灰泥飾中城磚鋪
砌地面并堦頭高一尺五寸白石壓欄石碇 東西
兩廊一十八間四椽入深一丈六尺各間闊一丈一

尺下簷單斗直替方額混栱方椽硬簷造頭頂丹粉
赤白裝造礬紅油造柱木中城磚鋪砌地面并砌堦
頭高一尺五寸頭頂鋪釘竹笆白灰仰泥中板瓦結
甕白石壓欄石碇東西兩簷並係土牆三十六間白
灰泥飾 後殿東西兩挾各一間六椽入深三丈各
間闊一丈六尺方混栱方椽硬簷造頭頂並係丹粉
赤白裝造礬紅油造柱木中城磚鋪砌地面土坯壘
砌坯牆白灰泥飾頭頂鋪釘竹笆白灰仰泥白石壓

欄石碇及中城磚砌堦頭高一尺五寸頭頂鋪釘竹
笆并案卓朱紅榻子八扇黃紗糊造鑰石葉事件
櫺星門一座柱頭上安閥閱并安卓門二扇並係礬
紅刷油造及釘造肘葉門鉸鵝臺桶子并石門砧
外籬門一座安卓門二扇並礬紅刷油造及安白石
門砧綽楔門一座安卓竹門二扇並係礬紅油造
神廚五間四椽入深二丈各間闊一丈一尺單斗直
替方額混椽方椽硬簷心間安釘平暗椽板一間頭

頂丹粉赤白裝造礬紅油造柱木直櫺窻白灰泥飾
壁落中板瓦結甕并壘砌鍋竈五事爐二隻白石壓
欄石碇 神厨過廊三間并奉使房二間及香火房
二間頭頂並丹粉赤白裝造礬紅油造柱木黑油直
櫺窻頭頂鋪釘竹笆仰堊中瓦板結甕行壘白灰泥
飾週迴壁落中城磚砌地面白石壓欄石碇內香火
房壘砌火窰子一座 潛火屋并庫屋四間頭頂簷
槽丹粉赤白裝造中板瓦結甕行壘白灰泥飾壁落

礬紅油造柱木門戶黑油直櫺窗中城磚壘砌堦頭
換衣廳三間頭頂中板瓦結甍鋪釘竹笆白灰仰
墁并週迴壁落礬紅油柱木黑油直櫺窗榻子丹粉
赤白裝造頭頂中城磚鋪砌地面并壘砌堦頭白石
壓欄石碇前後踏道 鋪屋圍牆裏外五間頭頂中

瓦板結甍白灰壁落礬紅刷造週迴簷槽及礬紅油
造柱木立精地袱中城磚壘砌堦頭磚砌水鋼五坐
廟子一座并龜頭一間頭頂中板瓦結甍行壘頭

頂丹粉赤白裝造礬紅油造柱木白灰泥壁落中城
磚砌地面并堦頭及踏道土地神衆共七尊黑漆供
牀一張 神游亭一座頭頂甌結甕行壘三面坐嵌
构欄子迴迴擗簾杆掛簪並礬紅油造頭頂丹粉赤
白裝飾方磚砌地面中城磚壘砌堦頭并踏道一座
及安白石碁臺一副并面南壘砌花臺一座長丈八
尺闊一丈五尺上安白石壓欄係白石望柱上攏黑
油方木櫺子十五丈 過道門四門頭頂中板瓦結

費白灰仰塗并壁落丹粉赤白裝造礬紅油柱木

週迴白灰圍牆長一百三丈六尺上用杙笆椽鋪釘
竹笆中板瓦結費行礬礬紅刷造杙笆椽白灰泥飾
一上下宮東壁扎縛打立竹實笆籬七十餘丈西
壁展套茨籬一百餘丈

一上下宮諸處白石板安砌路道長一百八十餘丈
一上下宮東西兩壁各打實竹籬長二十九丈六尺
并竹門二座 右件如前謹具申尚書省伏乞照會

謹狀淳熙十五年三月日履正大夫昭慶軍承宣使
入內侍省副都知欒宮修奉鈐轄霍汝弼降授右
武大夫榮刺史殿前副都指揮使欒宮修奉都護郭
棣

永思陵欒宮修奉使司承按行使司牒勘會本司於
今月十九日將帶太史局判局尅擇官詣欒宮按視
得聖神文武憲孝皇帝欒宮塋域神穴並神園四正
並得元按標劄地段除已奏聞外請照會施行本司

尋牒都壕寨官照應故例施行去後今據都壕官符
思永申本司尋牒監修官施行去後據回申據都壕
寨于慶等狀已將神穴心樁土末起拆訖又用底板
石補砌於當今來所修永思陵皇堂四壁箱壁石各
係二重共闊四尺膠土各闊四尺四寸擗土石一重
係各厚一尺通共元開南北長三丈七尺六寸東西
闊三丈二尺用石板安砌打築圓備其皇堂裏明深
九尺長一丈六尺二寸闊一丈六尺樽長一丈二尺

一寸高七尺一寸闊五尺五寸將來四壁若下神煞
并樽底及進梓宮次進樽身并安設天盤裏網委得
並無妨碍本司保明是實申乞照會續又據都壕寨
官符思永申備據監修官申尋勒合千人楊椿等開
具到皇堂丈尺并石段柏木枋等數目下項申乞照
會

一皇堂開通長三丈七尺六寸通闊三丈二尺深九
尺係裏明用擗土石五層週迴用一百六十段雙頭

石各長四尺闊二尺厚一尺壘砌一底板石三十段
內六段各長一丈一尺闊三尺二寸二十四段各長
四尺闊二尺五寸厚八寸一石藏裏明長一丈六尺
二寸闊一丈六寸深九尺係層雙頭石各長四尺闊
二尺厚一尺用三百二十四段壘砌并神穴心地已
補砌了當用過石一段一青石子口一十四段石段
上壓欄使用各闊一尺九寸五分厚八寸長短不等
一青蓋條用一十條各長一丈五尺闊二尺厚一尺

一承重柏木枋二十二條闊狹不等折荅闊一丈六尺二寸長一丈二尺二寸厚八寸青石蓋條承重柏木枋並已安範門試了當一壇係鋪兩重長一丈六尺闊一丈二尺用八六白壇四領四六白壇八領兩重共約厚二寸一攢訖皇堂上用香土二寸於香土上用客土六寸鋪襯訖用方磚鋪砌地面 右謹具申尚書省伏乞照會謹狀淳熙十五年三月日具位如前

朝野雜記紹興初六飛駐越昭慈聖獻皇后上賓因
卜地權殯於會稽上皇村蓋便於修奉也及卜祔陵
遂就其側并舉顯肅憲節二后祔焉顯仁高宗繼從
其兆則迫隘已甚矣高宗之葬也趙子直時守蜀手
疏論會稽攢宮淺薄可為深憂宜復祖宗山陵之制
朝論不從於是自昭慈之西連用五穴山勢漸遠其
地愈卑矣

宋史后妃傳憲節邢皇后從三宮北遷高宗即位遙

冊為皇后紹興九年崩於五國城顯仁太后回鑾始得崩聞十二年八月后梓宮至攢於聖獻太后梓宮之西北

宋史禮志憲聖慈烈皇后吳氏慶元三年崩四年三月權殯於永思陵

孝宗永阜陵

宋史禮志紹熙五年六月孝宗崩慶元二年詔於永思陵下宮之西修奉攢宮上陵名曰永阜

趙忠定公奏議臣伏見紹興元年昭慈聖獻皇后上
仙是時方駐蹕會稽江淮之間日事征戰昭慈之喪
未能歸祔始為殯厝盖用權宜將以憤激三軍之心
不絕中原之望也其後秦檜主和好而南北之勢分
永祐永思因仍不改聞見習熟視以為常遂致諸陵
尚存淺土其制卑薄可為深憂復於獻殿之中蔽以
厦屋不達天地之氣不覩日月之光年歲滋深大葬
無日考之典禮固已非宜驗之葬書亦所甚忌臣每

思及此良切痛心今大行壽聖皇帝將卜因山宜稽
舊典稍倣祖宗山陵之法亦從南北風土之宜但使
皇堂尺度不可太廣蓋石博厚不可不增修建陵臺
酌為中制仍為獻殿勿復幽扃庶幾葬者永安後嗣
蒙福伏乞聖明特賜俞允 又疏曰臣聞養生不足
以當大事惟送死可以當大事大行壽聖皇帝山陵
之奉陛下安得不致其敬也臣仰惟祖宗陵寢皆在
洛陽制度崇深具在簡策皇堂下深五十七尺高三

十九尺陵臺三層正方每面長九十尺既高且廣守衛至嚴後代子孫所宜觀法始緣南渡暫卜稽山號曰攢宮蓋非永制實居淺土蔽以上宮本朝克復神京奏遷靈駕雖其志甚美而其實難在再歲時今已六十餘載矣東南諸郡所至皆山凡擇地者必以山為限地勢局促不類中原蓋自昭慈之西已用五穴山勢漸遠其地愈卑往歲思陵之葬其深不盈九尺復土之後僅能掩棺間者寒心幾於慢藏雖江南

土地卑薄難擬故都然近今王氣所鍾豈無佳兆其
如拘以陰陽之術限以日月之期刑責太嚴事體至
重人懷苟且各為身謀至於國家深長之思君父危
辱之禍皆不暇顧惜嗚呼痛哉傳曰死者無終極國
家有廢興歷考古今無非商鑒今昌熙在遠恢復未
期豈宜徒徇虛名以基實禍臣比見按行使副還自
會稽皆言陰陽家流須用丙山壬向全類按圖索馬
不復他營若以昭穆安排苦無餘地僅一穴又下思

陵伏思穆恭二宮他日如何合祔其後利害臣未敢
言失今不圖後悔何及伏望陛下孝思罔極惟懷永
圖勿拘遠近之分毋惑陰陽之說擇平原高燥之地
為大行深固之藏崇建陵臺悉遵舊制陛下盡送終
之禮壽皇享萬世之安臣子不勝幸甚

朱子大全集具位臣朱熹準尚書吏部牒十月九日
殯宮覆窆使孫逢吉狀定到大行至尊壽皇聖帝神
宥事三省樞密院同奉聖旨令侍從臺諫限三日集

議聞奏臣方欲赴臺集議忽聞朝廷已別差官前去
宣諭即與衆官具狀申省別聽指揮外臣竊有愚見
深恐言之不早有誤大計須至先具奏聞者臣竊惟
壽皇聖帝聖德神功覆冒寰宇深仁厚澤浸潤生民
厭世上賓率土哀慕宜得吉土以奉衣冠之藏垂裕
後昆永永無極而因山之卜累月於茲議論紛紜訖
無定說臣嘗竊究其所以皆緣專信臺史而不廣求
術士必取國音坐丙向壬之穴而不博訪名山是以

麤畧苟簡唯欲附於紹興諸陵之旁不惟未得其形勢之善若其穴中水泉之害地面浮淺之虞偏仄傷破之餘驚動諸陵之慮雖明知之亦不暇顧羣臣議者又多不習此等猥賤之末術所以不能堅決剖判致煩明詔博訪在廷臣實痛之其敢無辭以對臣蓋聞之葬之為言藏也所以藏其祖考之遺體也以子孫而藏其祖考之遺體則必致其謹重誠敬之心以為安固久遠之計使其形體全而神靈得安則其子孫

盛而祭祀不絕此自然之理也是以古人之葬必擇其地而卜筮以決之不吉則更擇而再卜焉近世以來卜筮之法雖廢而擇地之說猶存士庶稍有事力之家欲葬其先者無不廣招術士博訪名山參互比較擇其善之尤者然後用之其或擇之不精地之不吉則必有水泉螻蟻地風之屬以賊其內使其形神不安而子孫亦有死亡絕滅之憂甚可畏也其或雖得吉地而葬之不厚藏之不深則兵戈亂離之際無

不遭罹發掘暴露之變此又其所當慮之大者也至於穿鑿已多之處地氣已洩雖有吉地亦無全力而祖宗之側數興土功以致驚動亦能挺災此雖術家之說然亦不為無理以此而論則今日明詔之所詢者其得失大槩已可見矣若夫臺史之說謬妄多端以禮而言則記有之曰死者北首生者南向皆從其朔又曰葬於北方北首三代之達禮也即是古之葬者必坐北而向南蓋南陽而北陰孝子之心不忍死

其親故雖葬之於墓猶欲其負陰而抱陽也豈有坐
南向北反背陽而向陰之理乎若以術言則凡擇地
者必先論其主勢之強弱風氣之聚散水土之淺深
穴道之偏正力量之全否然後可以較其地之美惡
政使實有國音之說亦必先此五者以得形勝之地
然後其術可得今乃全不論此而直信其庸妄之偏
說但以五音盡類羣姓而謂冢宅向背各有所宜乃
不經之甚者不惟先儒已力辨之而近世民間亦多

不用今乃以為祖宗已來世守此法順之則吉違之則凶則姑亦無問其理之如何但以其事質之則其謬不攻而自破矣蓋自永安遷奉以來已遵用此法而九世之間國統再絕靖康之變宗社為墟高宗中興匹馬南渡壽皇復自旁支入繼大統至於思陵亦用其法而壽皇倦勤之後旋即升遐太上違豫日久以至遜位赤山亦用其法而莊文魏邸相繼薨謝若曰吉凶由人不在於地不有所廢其何以興則國音

之說自為無用之談從之未必為福不從未必為禍
矣何為信之若是其篤守之若是其嚴哉若曰其法
果驗不可改易則洛越諸陵無不坐南而向北固已
合於國音矣又何吉之少而凶之多邪臺史之言進
退無據類皆如此試加詰問使之置對必無辭以自
解矣若以地言則紹興諸陵臣所未覩不敢輕議然
趙彥逾固謂舊定神穴土肉淺薄開深五尺下有水
石難以安建矣而荆大聲者乃謂新定東頭之穴比

之先定神穴高一尺一寸五分開深九尺即無水石
臣當詳考二人之言反復計度新穴比之舊穴只高
一尺一寸五分則是新穴開至六尺一寸五分則與
舊穴五尺之下有水石處高低齊等如何却可開至
九尺而其下二尺八寸五分無水石邪且大聲既知
有此無水吉穴當時便當指定何故却定土肉淺薄
下有水石之處以為神穴直至今日前說漏露無地
可葬然後乃言之邪其反覆謬妄小人常態雖若不

足深責然其姦心乃欲奉壽皇梓宮置之水中而畧
無顧忌則其罔上迷國大逆無道之罪不容誅矣脫
使其言別有曲折然一板之地其廣幾何而昭慈聖
皇皇后已用之矣徽宗一帝二后又用之矣高宗一
帝一后又用之矣計其地氣已發洩而無餘行圍巡
路下宮之屬又已迫狹之甚不可移減今但就其空
處即以為穴東西趨那或遠或近初無定論蓋地理
之法譬如針灸自有一定之穴而不可有毫釐之差

使醫者之施砭艾者如今日臺史之定宅兆則攻一
穴而遍身皆創矣是又安能得其穴道之正乎若果
此外別無可求則亦無可奈何而今兩浙數州皆為
近甸二三百里豈無一處可備選擇而獨遷就偏仄
於此數步之間邪政使必欲求得離山坐南向北之
地亦當且先泛求壯厚高平可葬之處然後擇其合
於此法者況其謬妄不經之說初不足信也邪臣自
南來經由嚴州富陽縣見其江山之勝雄偉非常蓋

富陽乃孫氏所起之處而嚴州乃高宗受命之邦也
說者又言臨安縣乃錢氏故鄉山川形勢寬平深邃
而臣未之見也凡此數處臣雖未敢斷其必為可用
然以臣之所已見聞者逆推其未見未聞安知其不
更有佳處萬萬於此而灼然可用者乎但今偏信臺
史之言固執紹興之說而不肯求耳若欲求之則臣
竊見近年地理之學出於江西福建者為尤盛政使
未必皆精然亦豈無一人麤知梗概大約平穩優於

一二臺史者欲望聖明深察此理斥去荆大聲置之於法即日行下兩浙帥臣監司疾速搜訪量支路費多差人兵輜馬津遣赴闕令於近甸廣行相視得五七處然後遣官案行命使覆案不拘官品但取通曉地理之人參互考較擇一最吉之處以奉壽皇神靈萬世之安雖已迫近七月之期然事大體重不容苟簡其孫逢吉所謂少寬日月別求吉兆為上此十字者實為至論惟陛下采而用之庶幾有以少慰天下

臣子之心為國家祈天永命之助臣本儒生不曉術數非敢以淫巫瞽史之言眩惑聖聽自速譏誚蓋誠不忍以壽皇聖體之重委之水泉沙礫之中殘破浮淺之地是以痛憤激切一為陛下言之譬如鄉鄰親舊之間有以此等大事商量吾乃明知其事之利害必至於此而不盡情以告之人必以為不忠不信之人而況臣子之於君父又安忍有所顧望而默默無言哉惟陛下詳賜省察斷然行之則天下萬世不勝

幸甚謹錄奏聞

朝野雜記紹熙末將營永阜陵趙子直以思陵之旁
土薄水淺議卜於臨安之中軍寨朱晦翁亦乞於近
畿改卜衆議不同復祔於會稽之域其後遂建永崇
陵焉

孝宗將殯子直為樞密使建議以櫓宮本非永制實
居淺土蔽以上宮初期尅復神京奉遷神駕雖其志
甚美而其實難且死者無終極國家有廢興豈宜

徒徇虛名以基實禍識者深以為然時日官荆大聲
已卜地思陵之旁開深五尺下有泉石按行使趙德
老以為土肉淺薄不可用于直乞改卜意欲以中軍
寨為之而宰相留仲至以為不然於是德老與覆按
使謝子肅附其說乃命大聲改卜於新穴之東視新
穴纔高一尺一寸五分而已孫從之為覆按使還言
當少寬時日別求吉兆而內廷左右以上久居喪次
內外不便皆主速葬之說乃詔侍從臺諫限三日集

議議者皆言神穴未安自合展期改卜況朝廷禮文何嘗盡循古制豈必拘七月之期奏劉德修所草也朱晦翁時在經筵復上奏論臺史國音之說不可信又言今穴視前穴高一尺一寸五分則是開至六尺一寸五分即與舊穴五尺之下負水石處高低齊等如何却可開至九尺而其下二尺八寸五分者無水石邪臣自南來經由嚴州及富陽縣其江山之勝雄偉非常說者又言臨安縣乃錢氏故鄉山川形勢寬

平遠密此必有佳處可用而臣未之見也竊見近年
地理出於江西福建為尤盛望下兩路帥臣監司疾
速搜訪量給路費多差人兵輜馬津遣赴闕令於畿
甸廣行相視或謂晦翁之意似屬蔡元定李通也所
謂國音者蓋近世庸妄之說以五音盡類羣姓而謂
冢地向背各有其宜以國姓論之必當用離山坐南
向北之地晦翁謂以禮而言則死者北首若以術言
則凡擇地者必論主勢之強弱風氣之聚散水土之

淺深穴道之偏正力量之全否然後可以較其地之
美惡政使實有國音之說亦必先此五者以得形勝
之地然後其術可得而推若曰其法果驗不可改易
則洛越諸陵無不坐南向北固已合於國音又何吉
之少而凶之多邪疏入不報其後卒定永阜殯陵於
會稽子直請如故事建陵臺同列又以後喪踰前喪
而止故崇陵亦因之若成穆成恭二后則先葬於赤
山慈懿皇后則殯於南山淨慈寺

宋史后妃傳孝宗成穆郭皇后生光宗紹興二十六年薨及受禪追冊為皇后謚恭懷尋改安穆及營阜陵又改成穆

成恭夏皇后乾道三年崩謚安恭寧宗時改謚成恭宋史禮志成肅皇后謝氏開禧三年崩殯於永阜陵正北吏部尚書陸峻等言伏覩列聖在御間有諸后上仙緣無山陵可祔是致別葬若上仙在山陵已卜之後無有不從葬者其他諸后葬在山陵之前神靈

既安並不遷祔惟元德章懿二后方其葬時名位未正續行追冊其成穆皇后孝宗登極即行追冊改殯所為攢宮典禮已備與元德章懿事體不同所以更不遷祔竊稽前件典禮祇緣喪有前後勢所當然其於禮意却無隆殺今來從葬阜陵為合典故從之

光宗永崇陵

宋史慶元六年八月庚寅太上皇帝不豫辛卯崩于壽康宮十二月辛卯權攢於永崇陵

文獻通考慶元六年光宗崩丞相謝深甫等上陵名
曰永崇案行使副韓邈黃鑑言判太史局荆大聲等
相視得大行太上皇帝神穴係在永阜陵西永思陵
下宮間地段委是國音王氣聚秀之地依得尊卑次
序可以安建既而差官覆按從之

宋史后妃傳光宗慈懿李皇后慶元六年崩權殯于
臨安府南山之修吉寺

寧宗永茂陵

宋史本紀嘉定十七年八月丁酉帝崩于福寧殿寶慶元年三月癸酉葬于會稽之永茂陵

宋史后妃傳寧宗光淑韓皇后慶元六年崩權攢于臨安府南山之廣教寺

宋史禮志寧宗恭聖仁烈皇后楊氏紹定五年十二月崩祔葬茂陵

方輿勝覽寧宗茂陵其地乃泰寧寺舊址嘉定十七年冬命楊昺為按行使歸奏云泰寧寺之山岡巖偉

特五峯在前直以上皇青山之雄翼以紫金白鹿之
秀宜為先帝弓劍之藏遂遷寺定卜焉

理宗永穆陵

宋史本紀景定五年冬十月丁卯帝崩咸淳元年三
月甲申葬于會稽之永穆陵

度宗永紹陵

宋史本紀咸淳十年秋七月癸未帝崩于福寧殿德
祐元年正月壬午葬于永紹陵

乾學案元世祖時江南浮屠總攝楊璉真珙
方怙勢淫虐嗾其徒嗣古妙高上言前宋會
稽諸陵寢當毀是時丞相桑哥擅政即可其
奏真珙遂悉掘徽宗以下十餘陵攫取金玉
珍寶無遺已乃盡裒諸帝后骸骨建白塔於
杭之故宮名曰鎮南以示壓勝又截理宗顱
骨為飲器真珙敗其資皆籍於官飲器亦入
宣政院以賜所謂帝師者至明太祖時危素

在翰林宴見備言始末於上上歎息良久謂
素曰宋主初無大失德元與宋亦無世仇既
取其國何乃縱姦人肆惡若此邪特遣主事
谷秉義至北平購訪顱骨所在得諸西僧汝
納所諭有司厝於高坐寺之西北其明年紹
興以永穆陵圖來獻遂勅葬故陵

輟耕錄吳興王筠菴先生國器示余所藏唐義士傳
讀之不覺令人泣下謹錄之傳曰辛亥秋友人端叟

倪君過余溪上示遊杭雜藁中有識唐王潛事一篇
余讀大驚頓足起立曰異哉今世乃有此人有此事
願詳告我叟乃言曰唐君名珏字玉潛會稽山陰人
家貧聚徒授經營滄瀨以養其母歲戊寅有總江南
浮屠者楊璉真加怙恩橫肆勢焰燦人窮驕極淫不
可具狀十二月十有二日帥徒役頓蕭山發趙氏諸
陵寢至斷殘支體攫珠襦玉柙焚其齒棄骨草莽間
唐時年三十二歲聞之痛憤亟貨家具得白金百星

許執券行貸得白金又百星許乃具酒醪市羊豕邀里中少年若干輩狎坐轟飲酒且酣少年起謝曰君儒者若是將何為焉唐慘然具以告願收遺骸共瘞之衆謝曰諾中一少年曰發丘中郎將耽耽餓虎事露奈何唐曰余固籌之矣今四郊多暴骨取竄以易誰復知之乃斲文本為匱複黃絹為囊各署其表曰某陵某陵分委而散遣之絕地以藏為文而告詰旦事訖來集出白金羨餘酬戒勿泄越七日總浮屠下

令裒陵骨雜置牛馬枯骸中築一塔壓之名曰鎮南
杭民悲感不忍仰視了不知陵骨之猶存也禍淫不
爽流傳京師上達四聰天怒赫赫飛風雷號令梓首
禍者北馬山陰人始有籍籍傳唐氏者由是唐之義
風震動吳越唐葬骨後又於宋常朝殿掘冬青樹植
於所冢土堆上作冬青行二首曰馬箠問髡形南面
欲起語野麕尚純束何物敢盜取餘花拾飄蕩白日
哀后土六合忽怪事蛻龍挂茅宇老天鑒區區千載

護風雨又曰冬青花不可折南風吹涼積香雪遙遙
翠蓋萬年枝上有鳳巢下龍穴君不見犬之年羊之
月辟歷一聲天地裂復有夢中詩四首曰珠亡忽震
蛟龍睡軒敞寧忘犬馬情親拾寒瓊出幽草四山風
雨鬼神驚一坏自築珠丘土雙匣親傳竺國經只有
春風知此意年年杜宇哭冬青昭陵玉匣走天涯金
粟堆寒起暮鴉水到蘭亭轉嗚咽不知真帖落誰家
珠鳬玉鴈又成埃斑竹臨江首重回猶憶年時寒食

節天家一騎奉香來余客錢唐久熟悉其事唐至今
無恙此雲溪羅先生有開所撰也及見遂昌鄭明德
先生元祐所書林義士事蹟云宋太學生林德陽字
景曦號霽山當楊總統發掘諸陵寢時林故為杭丐
者背竹籬手持竹夾遇物即以夾投籬中林鑄銀作
兩許小牌百十繫腰間取賄西番僧曰餘不敢望收
其骨得高冢孝冢斯足矣番僧左右之果得高孝兩
朝骨為兩角貯之歸葬於東嘉其詩有夢中作十首

其一絕云一坏未築珠宮土雙匣親傳竺國經只有
東風知此意年年杜宇哭冬青又曰空山急雨洗巖
花金粟堆寒起暮鴉水到蘭亭更嗚咽不知真帖落
誰家又曰橋山弓劍未成灰玉匣珠襦一夜開猶記
去年寒食日天家一騎捧香來餘七首尤淒怨則忘
之葬後林於宋常朝殿掘冬青一枝置於所冑土堆
上又有冬青花一首曰冬青花冬青花花時一日腸
九折隔江風雨清影空五月深山落微雪石根雲氣

龍所藏尋常蟻蝻不敢穴移來此種非人間曾識萬
年觴底月蜀魄飛繞百鳥臣長夜一聲山竹裂又一
首有曰君不見羊之年馬之月辟歷一聲山石裂聞
其事甚異不欲書若林霽山者其亦可謂義士也已
此五詩與前所錄語句微不同詩中有雙匣字則是
收兩陵骨之意得非林義士詩羅雲溪以傳者之誤
而寫入傳中者乎但曰移宋常朝殿冬青植所園土
上而作冬青詩我意會稽去杭止隔一水或者可以

致之若夫東嘉相望千餘里豈能容易持去縱持去
又豈能不枯瘁作如此想又疑是唐義士詩且葬骨
一事豈唐方起謀時林已先得高孝兩陵骨邪抑得
唐所易之骨邪蓋各行其所志不相知會理固有之
載考之齊人周草窻先生密癸辛雜識所記云至元
二十二年乙酉八月楊髡發陵之事起於天長寺福
僧聞號西山者成於演福寺剡僧澤號雲夢者初天
長乃魏憲靖王墳寺聞欲媚楊髡遂獻其寺旋又發

魏王冢多得金玉以此起發陵之想澤一力贊成之
俾泰寧寺僧宗愷宗允等詐稱楊侍郎汪安撫侵占
寺地為名告詞出給文書將帶河西僧及凶黨如沈
照磨之徒部令人夫發掘時有中官陵使羅銳者守
陵不去與之極力爭執為澤痛箠脅之以刃令人逐
去大哭而出遂先啓寧宗理宗度宗楊后四陵刳取
寶玉極多惟理宗之陵所藏尤多啓棺之初有白氣
亙天蓋寶氣也理宗之尸如生其下皆藉以錦錦之

下承以竹絲細簞一小廝攫取擲地有聲乃金絲所
成或對云舍珠有夜明者乃倒懸其尸樹間漚取水
銀如此三日竟失其首或謂西番僧回回其俗以得
帝王髑髏可以厭勝致富故盜去耳事竟羅陵使買
棺製衣收斂大慟垂絕鄰里為之感泣是夕聞西山
有哭聲凡晝夜不絕至十一月復發徽欽高孝光五
陵益章吳謝四后陵初徽欽葬五國城數遣使祈請
於金人欲歸梓宮凡六七年而後許至此被發掘徽

欽二陵皆空無一物徽陵有朽木一段欽陵有木燈
檠一枚而已蓋當時已料其真偽不可知不欲逆詐
亦以慰一時之人心耳而二帝遺骸浮沈沙漠初未
嘗還也高宗陵骨髮盡化畧無寸餘止錫器數件端
硯一隻硯為澤所得孝陵亦蛻化無餘止頂骨小片
內有玉鑪瓶一副古銅鬲一隻亦為澤所得昔聞有
道之士能蛻化而仙未聞并骨蛻者真天人也若光
寧與諸后優然如生羅陵使亦如前棺斂後悉從火

化可謂忠且義矣當與張承業同傳陵中金錢以萬計皆為死氣所蝕如銅鐵狀以故諸兇棄而不取往往為村民所得聞有得猫睛異寶者一村翁於孟后陵得一髻其髻長六寸餘其色紺碧髻根有短金釵遂取以歸以其帝后遺物度置佛堂中奉事之自此家道寢豐凡得金錢之家非病即死翁恐甚急送龍洞中而此翁今成富家矣方移理宗尸時澤在旁以足蹴其首以示無懼遂覺奇痛一點起於足心自此

苦足疾數年以致潰爛雙股墮落十指而亡聞既得志且富不義之財復倚楊髡勢豪奪鄉人產業後為鄉夫二十人伺道間屠而齧之罪不加衆各不過受杖而已其愷與楊髡分贓不平已受杖死尚有允在據此說則雲溪所傳歲月絕不同蓋嘗論之至元丙子天兵下江南至己酉將十載版圖必已定法制必已明安得有此事然戊寅距丙子不三年竊恐此時庶事草創而妖髡得以肆其惡與妖髡就戮羣兇接

踵殞於非命天之所以禍淫者亦嚴矣但云高宗陵骨髮盡化孝宗陵頂骨小片不知唐義士所易者何骨也林義士所收者又何骨也惜余生晚不及識宋季以來老儒先生以就正其是非姑以待熟兩朝典故之人而問焉

彭瑋曰輟耕錄載宋發諸陵事未備謹案元世祖二十一年甲申桑哥為相與江南浮屠摠攝楊璉真珈相表裏族僧嗣古妙高上言欲毀宋諸陵明年乙酉正月桑哥矯制可其奏於是發諸陵實利其殉寶也又哀諸帝遺骸建白塔於杭故宮曰鎮南以厭勝之截理宗頂以為飲器未幾髡胡事敗飲器亦籍入於

官以賜帝師發陵時唐珏玉潛雷門先生與尚書省
架閣林景熙竊痛之陰相躬拾不盡遺骨葬別山下
植冬青為識遇寒食則密祭之珏後獲黃袍引兒報
德之夢果生子珏為名儒羅雲溪為傳其事謝翱為
託瘦詞作冬青引曰冬青樹山南垂九日靈禽居上
枝知君種年星在尾也寅月根到九泉護龍髓恒星晝
墮夜不見七度山南與鬼戰願君此心慎勿移此樹
終有開花時山南金粟花離離白衣人拜地下起靈
禽啄粟枝上飛珏又有感雷震白塔詩曰冬青花不
堪拆南風吹涼積香雪遙遙華蓋萬年枝上有鳳巢
下龍穴羊兒年犬兒月霹靂一聲天地裂至正月十
九年己亥偽周張士誠遣平章張士信守杭壞白塔
甃城塔亡而元亦馴至於亡矣是錄所載重複羅傳
年月不同白塔一節可據鄭傳已自與前後不同無
可據癸辛錄年月同失理宗首一節為飲器張本可
據唐林二義士本同事者梧溪集羅鄭傳之乃各立

異不免傳疑今據史臣宋景濂高季迪并先儒楊維禎王逢原諸集以訂補其未備觀者詳之

孫賜曰徽欽二帝陵在高麗地方二陵大如山高麗人皆知為宋二帝陵也蓋金時幅負甚廣高麗北境皆其地彼時葬二帝於此以空柩歸中國耳

乾學案癸辛雜識謂元姦僧發徽欽二陵皆空棺先時為金人所紿原未嘗還中國越中何嘗有徽欽之陵而姦僧又於何所發掘觀此一事之謬則諸說之傳聞失實亦有之矣

端宗永福陵

行朝錄祥興元年九月葬端宗皇帝于崖山陵曰永福

廣州鄉賢錄帝舟次於化州之界病大作四月帝崩於碭州曾淵子充山陵使奉帝殯於香山馬南寶家偽為梓宮出葬其實永福陵在崖山也

遼太祖祖陵

遼史天顯元年七月甲戌次扶餘府上崩九月丁卯梓宮至皇都權殯于子城西北二年八月丁酉葬于

祖陵置祖州天成軍節度使以奉陵寢

遼后妃傳淳欽皇后述律氏應歷三年崩祔祖陵

太宗懷陵

遼史大同元年夏四月丁丑上崩于樂城九月壬子朔葬于鳳山陵曰懷陵

后妃傳靖安皇后蕭氏生穆宗天顯十年崩葬奉陵
世宗顯陵

遼史天祿五年九月帝自將南伐次歸化州察割反

帝遇弑應歷元年葬于顯州西山陵曰顯陵

后妃傳懷節皇后蕭氏生景宗天祿末立為后察割作亂遇害

世宗妃甄氏後唐宮人帝從太宗南征得之及即位立為皇后察割作亂遇害景宗立葬二后于醫巫閭山建廟陵寢側

穆宗懷陵

遼史應歷十九年三月近侍小哥盪人花哥庖人辛

古等六人反帝遇弑祔葬懷陵

景宗乾陵

遼史乾亨四年九月辛雲州獵於祥古山帝不豫壬子次焦山崩十二月癸酉奉大行皇帝梓宮於叢塗殿統和元年二月甲午葬乾陵

后妃傳睿知皇后蕭氏生聖宗統和二十七年崩遼史本紀二十八年夏四月甲子葬太后於乾陵

聖宗慶陵

遼史太平十一年六月丁丑朔駐蹕大福河之北己卯帝崩於行宮乙未奉梓宮殯於永安山太平殿八月壬午遷梓宮於叢塗殿十一月甲午葬於慶陵后妃傳仁德皇后蕭氏欽哀皇后蕭氏並祔慶陵興宗慶陵

遼史重熙二十四年秋七月如秋山次南崖之北峪不豫八月丁亥疾大漸己丑帝崩於行宮十一月甲子葬於慶陵宋及高麗遣使來會名其山曰永興

后妃傳仁懿皇后蕭氏生道宗太康二年崩

遼史本紀太康二年六月甲午葬仁懿皇后於慶陵

道宗慶陵

遼史壽隆七年春正月甲戌上崩於行宮六月辛亥
葬於慶陵

后妃傳宣懿皇后蕭氏乾統初合葬慶陵 惠妃蕭
氏太康二年立為皇后葬太子山

天祚帝

遼史保大五年帝為金人所獲降封海濱王改封豫
王皇統五年葬於廣寧府閭陽縣乾陵旁

宣宗永安陵

遼史耶律溥者世號為北遼興宗第四孫保大二年
入夾山奚王回離保林牙耶律大石等引唐靈武故
事勸進遂即位建福元年病死葬燕西香山永安陵
附義宗顯陵

遼史宗室傳義宗名倍太祖長子神冊元年立為皇

太子忽汗城降復叛太祖破之改其國曰東丹名其城曰天福以倍為人皇王主之仍賜天子冠服建元甘露太祖計至倍即日奔赴山陵知皇太后意欲立德光乃讓位焉葬於醫巫閭山世宗即位謚讓國皇帝陵曰顯陵

乾學案遼太宗葬懷陵穆宗祔焉可也聖宗葬慶陵而興宗道宗皆因之何與東丹王之葬既名之曰顯陵矣而世宗復曰顯陵均未

可言禮也

金始祖光陵

金史世紀金之始祖諱函普天會十四年追謚景元皇帝廟號始祖皇統四年號其藏曰光陵

德宗熙陵

金史世紀德帝諱烏珪天會十四年追謚德皇帝皇統四年號其藏曰熙陵

安帝建陵

金史世紀安帝諱跋海天會十四年追謚安皇帝皇
統四年號其藏曰建陵

獻祖輝陵

金史世紀獻祖諱綏可天會十四年追謚定昭皇帝
廟號獻祖皇統四年號其藏曰輝陵

昭祖安陵

金史世紀昭祖諱石珪天會十四年追謚成襄皇帝
廟號昭祖皇統四年號其藏曰安陵

景祖定陵

金史世紀景祖諱烏古迺天會十四年追謚惠桓皇帝廟號景祖皇統四年藏號定陵

世祖永陵

金史世紀世祖諱刻里鉢天會十五年追謚聖肅皇帝廟號世祖皇統四年藏號永陵

肅宗泰陵

金史世紀世祖母弟頗拉淑景祖第四子也是為肅

宗天會十五年追謚穆憲皇帝皇統四年藏號泰陵
穆宗獻陵

金史世紀穆宗諱英格景祖第五子也天會十五年
追謚孝平皇帝廟號穆宗皇統四年號其藏曰獻陵
康宗喬陵

金史世紀康宗世祖長子也天會十五年追謚恭簡
皇帝皇統四年號其藏曰喬陵

乾學案天會金太宗建元也本紀止十三年

而世紀屢書十四十五年未詳

煬王紀正隆元年七月己酉命太保昂如上京奉遷
始祖以下梓宮八月丁丑如大房山行視山陵十月
乙酉葬始祖以下十帝於大房山

太祖睿陵

金本紀天輔七年八月戊申上崩于部堵灤西行宮
九月癸丑梓宮至上京乙卯葬宮城西南寧神殿天
會十三年二月辛酉改葬和陵立開天啓祚睿德神

功之碑于燕京城南常所駐蹕之地皇統四年改和陵曰睿陵貞元三年十一月改葬于大房山仍號睿陵

海陵煬王紀貞元三年三月乙卯命以大房山雲峯寺為山陵建行宮其麓命判大宗正事京等如上京奉遷太祖太宗梓宮丙寅如大房山營山陵八月甲申啓土十月己卯梓宮至中都以大安殿為丕承殿安置丁酉大房山行宮成名曰磐寧十一月乙巳朔

梓宮發丕承殿戊申山陵禮成

金史后妃傳太祖欽憲皇后赫舍哩氏天會十四年正月崩于慶元宮二月癸卯祔葬睿陵

金史海陵遷諸陵于大房山以達蘭嘗給事太祖命作石像置睿陵前

太宗恭陵

金本紀天會十三年正月己巳上崩于明德宮三月丁酉葬和陵皇統四年改號恭陵貞元三年十一月

戊申改葬于大房仍號恭陵

金史后妃傳太宗欽仁皇后唐古氏皇統二年崩于明德宮祔葬恭陵

神麓記金太祖葬地號曰泰陵太宗所葬之墳山號曰豫陵

乾學案金太祖睿陵太宗恭陵後改葬房山名仍其舊苗氏所紀特與不同或者其初擬名也

熙宗思陵

金本紀皇統九年十二月忽土阿勒楚呼弒帝亮復前手刃之帝崩左丞相秉德等遂奉亮為帝降帝為東昏王葬于皇后裴滿氏墓中貞元三年改葬于大房山蓼香甸諸王同兆域大定初追謚武靈皇帝廟號閔宗陵曰思陵二十七年改廟號熙宗二十八年以思陵狹小改葬于峨眉谷仍號思陵

思陵錄淳熙十五年諜報金人制曰朕惟熙宗孝成

皇帝以武元適孫受文烈顧命作其即位十有五年
偃兵息民中外安乂而海陵庶人亮包藏禍心覬覦
神器陰煽姦黨遂成篡逆而又厚加誣詆降徙王封
亮既得志肆其兇殘不道之極至於殺母人怨神怒
自底誅滅惟皇天眷祐於我家肆予一人纘承先緒
暴其罪惡貶為庶人仍黜其殯於兆域之外仰惟熙
宗位號宜正是以間者稽合禮文升祔太室復加美
謚尊而崇之惟葬非其所蓋嘗撫然爰命有司卜地

消日奉遷梓宮已於十月初八日備禮葬于思陵庶幾有以慰在天之靈也太宗二十八年十一月

金史后妃傳熙宗悼平皇后裴滿氏大定間祔葬思陵

海陵煬王墓

金本紀正隆六年九月上自將三十二總管兵伐宋十一月乙未完顏元宜等軍反帝遇弒崩大定二年降封為海陵郡王二月世宗使小底婁寶與南京官

遷其柩于寧德宮四月葬于大房山鹿門谷諸王兆域中二十年有司奏煬王之罪不當有王封亦不當在諸王塋域乃詔降為庶人改葬于山陵西南四十里

世宗興陵

金本紀大定二十九年正月壬辰朔上大漸癸巳崩于福安殿四月乙酉葬興陵

乾學案興陵熙宗既已名景宣帝之藏矣世

宗陵復名之何也

金史后妃傳世宗昭德皇后烏林荅氏世宗在濟南海陵召后来中都后念若身死濟南海陵必殺世宗惟奉詔去濟南而死世宗可以免后既離濟南行至良鄉去中都七十里從行者防之稍緩后得間即自殺世宗過良鄉葬后于宛平縣土龜原大定二年追冊為后十二年五月車駕幸土龜原致奠十九年改卜于大房山十一月戊午奉安于磐寧宮庚申葬於

坤厚陵二十九年祔葬興陵

元妃李氏生衛紹王大定二十一年以疾薨葬于海
王莊二十八年陪葬于坤厚陵

章宗道陵

金本紀泰和八年十一月乙卯上不豫丙辰崩于福
安殿大安元年二月甲申葬道陵

金史后妃傳章宗欽懷皇后蒲察氏崩大安初祔葬
道陵

宣宗德陵

金本紀元光二年十二月庚寅上崩于寧德殿明年三月庚申葬德陵

金史后妃傳宣宗明惠皇后王氏生哀宗正大八年九月崩遺命園陵制度務從儉約十二月己未葬汴城迎朔門外五里莊獻太子墓之西

附
徽宗興陵

金世紀景宣皇帝太祖第二子天會二年薨熙宗即

位追上尊諡曰景宣皇帝廟號徽宗改葬興陵

睿宗景陵

金世紀睿宗皇帝大定上尊諡陪葬睿陵改葬于大房山號景陵

金史后妃傳睿宗欽慈皇后蒲察氏睿宗元配大歷二年祔葬景陵

貞懿皇后李氏世宗母正隆六年五月初后自建浮圖于遼陽是為垂慶寺臨終謂世宗曰鄉土之念

人情所同吾已用浮圖法置塔於此不必合葬也世宗深念遺命乃詔有司增大舊塔起奉慈殿于塔前勅禮部尚書王競為塔銘

顯宗裕陵

金世紀顯宗皇帝世宗第二子大定二年立為皇太子二十五年六月崩于承華殿七月賜諡宣孝太子十一月庚寅葬于大房山世宗崩太孫即位是為章宗五月追諡光孝皇帝廟號顯宗陵曰裕陵

金史后妃傳顯宗孝懿皇后徒單氏明昌二年正月崩于隆慶宮祔葬裕陵

元諸帝陵

元之諸帝皆葬起輦谷


元史祭祀志凡宮車晏駕棺用香楠木中分為二刻肖人形其廣狹長短僅足容身而已殮用貂皮襖皮帽其靴襪繫腰盒鉢俱用白粉皮為之殉以金壺瓶二盞一碗楮匙筯各一殮訖用黃金為箍四條以束之輿車用白氈青緣納失失為簾覆棺亦以納失失

為之前行用蒙古巫媪一人衣新衣騎馬牽馬一足
以黃金飾鞍轡籠以納失失謂之金靈馬日三次用
羊奠祭至所葬陵地其開穴所起之土成塊依次排
列之棺既下復以次掩覆之其有剩土則遠置他所
送葬官三員居五里外日一次燒飯致祭三年然後
返

潘墳褚記室歷代送終之禮至始皇為甚侈窮天下
之力以崇山墳傾天下之財以滿藏槨盡後宮之女

以殉埋葬墳土未乾而國丘墟矣其他如漢唐宋陵
寢埋殉貨物亦多漢用即位之年上供錢帛之半其
後變亂多遭發掘形體暴露非徒無益盖有損焉元
朝棺裏用椁木二片鑿空其中類人形小合為棺置
遺體其中加髹漆畢則以黃金為圈三圈定送至其
直北園寢之地埋之則用萬馬蹴平俟草青方解嚴
則已漫同平坡無復考誌遺蹟豈復有發掘暴露之
患哉誠曠古所無之典也夫葬以安遺體遺體既安

多貲以殉何益哉



讀禮通考卷九十二